

明名臣言行錄

明名臣言行錄卷第五十八

尚書胡莊肅公松

字汝茂號栢泉滁州人嘉靖己丑進士累官吏部

尚書贈太子少保謚莊肅

幼卽嗜學嘗輯古名臣奏疏諦觀之嘆曰經理天下者不當如是耶初仕東平知州州有巨豪劇寇前守累不能收捕設法擒殞之民有訟必先諭之以禮不得已方置於法故民莫不愛其惠而畏其威至構祠祀

之

遷南兵部員外改禮部郎中公以部員冗職稍有餘暇

卽聚經史求微詞與旨叅稽考互必浹洽曉暢而後已且曰爲學如儲積然廣於收貯應用自不竭矣陞湖廣叅議職糧餉值湖北叛苗鎮筸之變紓籌策親履行陣遂致蕩平捷聞特降璽書慰勞有白金綵幣之賜尋督學山西樹風聲明經術以儲實材爲天下用士類亦彬彬嚮風焉

鹵酋入內地抄掠民倉卒奔避太原太原城堅閉弗納公憤然曰是非我赤子耶若何弗納弗納其奚用守爲守將懼遽納民民賴以全活甚衆於是遂上疏曰鹵之敢於深入者以邊將怯懦失於先機故也賞罰

不得當功罪不時審奸豪潛入鹵地爲嚮道而莫之察帥臣隱挫劙冒以捷聞而弗之究則備禦何由嚴而鹵安得不深入竊爲國家憂之謹上便宜十二事曰懲苟玩堅障堠懷携貳蓄孳牧慎任使利器具廣間諺清耗蠹嚴備禦核屯戍預積貯撫傷棄疊疊數千言皆切中邊計要害上可其奏卽擢參政協守鴈門關公文臣也一旦起言邊事人固忌之而疏中語頗侵當時用事者以故得罪去

公家居築娛老堂奉二親別構尚友堂聚天下諸書讀之又曰是文耳曷若偕一二同志遊東南歷覽形勝

當有脫悟處也時公同年友羅公洪先唐公順之亦以言事廢二公並有志學古者與入宜興山中盤桓究解而公之神已脫然超上乘矣

才薦起陝西叅政駐節平涼條奏數十事若嚴保甲均賦稅選伉健置常平大都可爲經久計者轉浙江按察使尋遷左右贛時將吏多骯法侵尅軍食傳侍按發其賦至巨萬人心肅然

擢副都御史巡撫江西適流賊豕突殺長吏率浙兵千餘人倍道出賊不意悉殲之因議曰豫章爲閩廣下流當受其衝莫若於要地增置城濠屯戍守先事而

待之復減額租理冤獄舉賢良黜貪墨民得蘇息立
石頌德焉始廣西賊帥張璉者黠慧獷獰爲諸酋最
其巢穴連諸洞寨驅羣蠻時出寇抄邊郡苦之諸路
連兵征討數歲不能克至是悉平公之功爲居多云
陞兵部侍郎拜吏部尚書獎恬退抑躁進擢用才儕以
報稱德意未幾疾卒

尚書吳文端公山

字江西高安人嘉靖乙未進士及第第三人官至禮部尚書萬曆中謚文端

嚴嵩用事公屬同鄉不附和之公嘗產女嵩子世蕃欲與求婚介大學士李本爲酒酒未行方奕本以手掩局語曰嚴長公之酒公知何爲公曰不知也本以情告公曰某老人也安從產女乎世蕃聞之蹙然不悅上意欲用公內閣下諭嵩公子請曰上意如此大人亦須赴嚴一揖明我家知恩公叱之曰兒不解事豈有閤老可揖求耶嵩遂密沮之公自是無進閣之望矣

三十九年上下禮部出封景王之國趣具儀嵩知上故未有意出景王特激於郭希顏之疏以覘嘗人心使人風公留行以悅上公曰二王居邸形跡相埒人心使危疑望此久矣上不諭部山不敢請也幸有旨復當留耶留而遂已將來國本未定孰任其咎卽具上之國儀注上不得已允行而公自是失寵矣

明年二月辛卯朔日食是日浮雲掩映倏隱倏見欽天監奏言日食不見卽同不食上悅歸貺天眷嵩自直使人急謂部上賀侍郎袁煥亦以請公指日語曰日之食也人皆見之吾誰欺欺天乎行救護如常旣

畢以報忤上旨遂引罪上曰山守禮之臣也不必引
罪該科官如何不參令以其狀對禮科都給事中李
東華等惶恐言聖德當陽祥雲護日當食不食此誠
敬格天之所致也山等不請臣等不糾厥罪惟均惟
上寬赦上曰日有微陰觀候無食天意甚著聖人事
天如臣事君君恩不感國典不容也山前執白鹿殊
祥原父天眷賜玄嗣強告殿廟今天意之著非測言
比乃如常敕護謂寧盡已誠不可失正賣直要名東
華不言山不舉賀者乃曰不謝玄不敬天孰甚焉其
住爲首者俸罰其餘各半歲已嵩言日食陰雲卽同

不食人所共知行禮如故部臣罪也請宥言官上是之改罰東華俸兩月餘悉宥免

上旣不悅公乃示風旨於科道諸臣吏科都給事中梁夢龍等共劾公而詛於公議時吏部尚書吳鵬賄聲狼籍百官進退唯唯嚴氏中外人心無不鄙憤遂以山與鵬並劾鵬方睦嚴上初無意去鵬以公故并令致仕去

公直亮方嚴臨事持論勁必以正嘉靖中會試舉人自二十九年以後多以懷挾取高第至三十八年言官建議請嚴摵簡如鄉場之體儀制郎欲覆請公曰鄉

會二試禮自不同會試之士歌鹿鳴而來者祖宗待之甚厚故防之亦輕今柰何自我破壞祖宗厚意蕭望之尚不願見更露索匆匆吾寧士負朝廷母朝廷負士也此役不行

巡撫淮揚都御史唐順之卒軍中總督胡宗憲欲以死事請冀得卹典嵩與世蕃中主之公曰卹典至重故事京堂官未考滿者非日講軍功不得唐公雖負才名晚節不終全歸官下曷云死事亦與祠祭郎李纘持之嵩怨公無所出出郎爲景王相亡何公亦去位順之乃得卹典始司禮太監黃錦嘗私語公曰公他

日去國得爲編民幸矣公愕然因爲道令景王之國
非上本意繼山爲尚書者逢諛矣

靳文僖繼夫人年未三十而寡儀曹郎與靳有姪姻請
旌典公執之曰婦以節旌制也第今令甲所載義夫
節婦孝子順孫諸旌典爲匹夫匹婦發潛德之光以
風世耳若士大夫之家何人不當爲節義孝順者采
靳公身爲鼎臣夫人已生受殊封矣柰何與匹夫匹
婦爭寵靈乎會當赴直西苑與大學士徐階遇階亦
以爲言公正色曰相公亦慮閣老夫人再醮耶階語
塞自是覘公憇不復與之言事矣

尚書王莊簡公學夔

字一卿安福人正德甲戌進士官至兵部尚書卒

年九十四

授刑部主事改吏部考功以疏諫罰跪午門廷杖

之嘉靖初上謹始疏深見嘉納又疏抑戚畹疏宥言
官歷考功文選員外郎中晉太常卿左遷福建叅議
尋撫鄖陽轉擢江皆有平寇功進吏部侍郎四年擢
南禮部尚書轉吏部四疏乞休不允改兵部得請致

仕

立朝蹟在銓司居多王槐野稱其未嘗陰庇一士陰入

一物家居敦儉素布袍糲飯有孺生所不能堪而獨
安之邑中人士若子姓謁見庭下多謝去外飾更着
粗敝惟恐見謂讓華靡之風爲之一變晚歲奉特恩
存問者再卒贈太子少保

原缺

總督石公永

字壽卿北直威縣人嘉靖壬辰進士官至兵部侍郎

僉都御史卒

授中書舍人乙未擢雲南道御史丙申巡山海關尋丁內艱服闋補河南道庚子按淮揚獎廉斥墨不少假貸法豪強爲民患者未幾疏乞養病歸壬寅起補山西道巡按四川所至訪吏治得失示勸懲有豪強按罪當流候公出伏刺客於橋下至則其人忽心疼作聲執之輸情請罪蓋鬼神默佑之也監癸卯鄉試綜理周密號稱得人

乙巳掌河南道大計京朝官持公秉正謝絕私交於小過不事苛索備訪當權怙勢潛通關節及中傷善類者密呈臺長曰必去此爲公不則縱吏部與臺長去留一無異議後有忌之者陞知南陽府尋以事詐誤陞判濱州怡然就道

丙午陞南京太僕寺丞丁未陞平陽知府芟煩祛靡與民休息藩府競訟累年不決委曲開導訟乃息太宰張潤稱其風寒貴戚威寢奸豪戊申陞陝西副使駐甘州竭力經營郊行見原隰草木蕃盛詢知舊爲水引以地震泉湧遂求瀆其泉五十餘處灌田八百餘

頃居民爭復業庚戌陞陝西右叅政視涼州地宜耕募民懇闢導泉以資灌溉後皆爲沃壤甲寅陞陝西按察使持憲明慎民以乂安

乙卯陞江西右布政丙辰轉山西左布政使未抵任陞都察院右僉都御史巡撫延綏至則飭將練兵革冗役禁包占懲負販養勇敢謹間諜有黠齒犯灰條溝前後斬首級獲駝馬器械甚衆節蒙金幣之賚凡三任朔方歷九年民戴之尤深

丁巳陞南京大理寺卿戊午改南京兵部右侍郎己未陞兵部左侍郎兼右僉都御史總督湖廣川貴等處

軍務一崇寬大率屬以廉凡事務責實效不爲文具
徭賊沈雅等勢猖獗督率將士直擣其巢于淑浦縣
龍潭等諸洞捉聞賜白金彩幣方隅晏然時督撫請
調葉麻等司兵禦倭公上疏極論不便乞免調以安
地方省糧餉蒙俞旨著爲令三十九年召爲戶部左
侍郎瀕行疾作三省以藥費贐禮致餽正言却之疾
篤總兵石邦憲副使李心學問所欲言自軍國外無
一語尋終二君爲欽視其橐中無一物胥嘆以爲不

可及云

侍郎靳公學顏

字子愚山東濟寧人舉省試第一嘉靖乙未進士官至吏部侍郎隆慶五年夏卒賜祭一壇給半葬授南陽府推官陞吉安知府下車罷諸供具及期會條教食用粗櫶刑無妄施獄無濫繫未數月郡以無事吏晨起抱文書印署畢退坐舍中蕭然無他營也郡右族或有造請必正色拒之嘗有以乞佃寺地爲言者公曰吾職在守土固不能以地與人廉平節愛吉人稱之累官左布政入爲太僕光祿寺卿

隆慶初拜都察院副都御史巡撫山西時星變求言公

應詔上理財疏畧曰臣惟今日耗天下之財者兵也而邊兵不可以言耗蓋國家海內皆兵民處其七以供舊軍之餉新軍則一切仰給太倉舊軍之餉不減自新軍之餉日增其費一周之鎰洛漢之兩都皆空名也而我朝兩都並建官卒叢集坐靡公幣其費二宋之宗室親疎有等散處民間通名仕籍今則出城有禁入仕無階不農不商坐食常餼其費三天下之兵曰邊兵曰京兵曰留都兵曰腹內衛所兵此四者坐食雖同而緩急則異其目曰見伍曰招募曰徵調曰清勾曰充發五者之中見伍招募爲實應急濟事

所與負材勁而當矢石者非召募乎根生土著所與長子孫而充營伍者非見伍乎清勾充發按冊則可觀責效則無質徵調以資擺守而虛彼實此徒費齋送山東諸省義勇民壯原非祖制今乃供勾攝掃除之役請徵其餉以實邊備而京兵之不可汰者亦請責以輪番戍守之法又大行鑄錢之法以通融於五穀之外重積貯之令以盈虛於豐歉之間庶其恒足乎疏入下所司議行尋入爲工部侍郎改吏部直高拱柄國移疾乞歸不出公守正不阿泊然無所嗜好文學氣節俱爲士林推重云所著有兩城集行於世

侍郎冀端恪公錄

字山東益都人嘉靖

進士官至兵部侍

郎卒賜祭葬謚端恪

少好學讀諸大儒遺書博綜經史其無關正學者悉罷之其學以誠爲主以敬爲宗舉止語默皆有成法登第後官長治專以孝弟訓民省刑簡訟民化從之累官巡撫河南擒巨寇督河工受上賞晉巡撫保定加侍郎告歸生平以禮義自持不爲矯矯之節居家不問有無沒無以供葬子孫售產以辦

明名臣言行錄卷第五十八

終

明名臣言行錄卷第五十九

總督曾襄愍公銑

字子重號石塘江都人嘉靖己丑進士官至副都御史死於西市隆慶初言官頌冤贈尚書賜祭葬

謚襄愍

授長樂知縣召爲御史按山東遼陽三城軍士作亂窮辱撫臣縱火散囚閉城拒命世宗聞變震驚下廷臣議謂曩歲大同殺撫鎮官茲又效尤不伐罪討叛無也一任處分朕不專制公單騎往諭朝廷恩威三軍

歡聲動地曰御史生我矣反側漸寧公簡任韓永慶等指授方畧不閱月三城倡禍者率就縛餘安堵如故具上其事廟堂上公功陞大理寺丞

擢右僉都御史巡撫山東二十一年秋鹵吉囊突入十八盤欲襲臨清遣奸細小哈兒窺覘道路公奏築新城以阻之二十四年山西巡撫缺廷議上公名上曰朕知其人是嘗平遼亂者詔報可公至大修邊牆添製火器鹵攻浮圖峪率兵平型以堵西突鹵入鶴鵠峪直趨廣寧以防北衝鹵不敢近邊者二年

乙巳秋鹵寇陝西三邊督撫諸臣一時被逮總督難其

人上以屬公遂兼程往時賊十萬騎繇寧塞突厥公
曰齒斜衆來當攻其所必救遂命中軍叅將李珍率
勁卒搗其巢穴斬獲首齒百一十有奇竿以示齒齒
大懼遁去公復計曰醜齒頻年內侵如蹈無人之境
今驟聞巢穴有急倉皇遁去不料我師邀其前也親
督將士晝夜由新安邊外直趨定邊擊之黎明齒見
大將旗鼓相顧錯愕遂大潰斬賊級百八十生擒一
人奪獲達馬鞍器無算邊人謂近年未有功而公不
以捷聞御史勘功始奏曰曾銑志吞月蝟威震天驕
博帶臨戎潰把都河數十萬之齒單騎出塞搗跨焉

梁數百里之巢克壯厥猷懋昭偉績且有功不伐尤
邊臣所難詔以銀幣重賞之公感上知遇益思圖報
念套鹵爲中國患苦乃上疏曰謹按河套古朔方地
是南仲所襄獮狁衛青所取河南張仁愿所城受降
之界也高皇帝驅逐故元遠遯漠北文皇帝六龍三
駕卒率鹵廷薄海內外皆入版圖豈但界限河套已
哉後以東勝孤懸撤之內守復改榆林爲鎮方初徙
時套內無鹵土地沃膏草木繁茂禽獸生息當事之
臣不以此時據河爲守乃區區榆林之築此時鹵勢
未大猶有委也失此不爲弘治八年鹵編筏渡河剽

掠士馬十二年擁衆入寇自後住牧套內侵擾中原
孝廟志欲復之而未逮武廟方欲征之而未能因使
鹵酋吉囊據爲巢穴出套則寇宣大三關以震京甸
入套則寇延寧甘固以毒生民一統故疆三邊沃壤
頃年不守遂使深山大川勢顧在彼而寧夏外險反
南備河浸淫虛耗日爲中國之害天心撥亂將待陛
下陛下選將練兵宵旰日切歲發帑銀以濟邊圉凡
所以攘卻外患保安兆民者至矣封疆之臣曾無有
爲國家深長之思以收復祖宗舊業爲生民立命者
蓋軍興重務也圖近利則壞遠謀小有挫失媒孽踵

至鼎鑊刀鋸面背森然臣非不知兵凶戰危未易舉
動但志在滅常懷憤激今親履其地目覩此齒跳

梁三邊危殆切齒痛心謹條爲八事一曰定廟謨

日立綱紀三曰審機宜四曰選將材五曰任賢能六

日足芻餉七日明賞罰八日備長技上曰鹵據套鹵

久爲內患連歲深入全陝荼毒深軫朕懷逐鹵復套

前此邊臣無有念此銑奏具見壯猷兵部許久題覆

迄無定見其令銑督同各邊撫鎮協心圖議務求長

策嗣上方畧公復條上十八事兵部覆題上曰朕軫

懷套鹵有年矣念無任事之臣耳曾銑前後所上方

畧卿等既已看詳便會同多官協忠定計來說公如
上倚注方深晝夜講求滅齒策演成行師機宜列爲
八圖次第其說上之於是領兵入套攻搗齒近塞駐
牧往來侵掠居民不能樵採公出擊之斬首二十七
級生擒脫脫虎一人餘斃矢石者甚衆獲馬牛駝及
彝器以千計內十萬騎自寧塞入犯延安慶陽保安
諸處掠男婦八千餘人公遣參將珍夜出塞刦其營
帳斬虜首百餘級自是齒聞公來皆驚指多移營渡
河矣公自謂績必可成而嵩與言不相能常思有以
中之乃曰上指謂其非計臺省遂附嵩騰疏攻言以

去會咸寧侯仇鸞時方挾寵而鸞先爲公所劾有旨
逮詔獄鸞赴闕自理至是嵩乃授鸞意令以復套事
攻公賄言表裏作奸覬圖太福校繫來京法司擬罪
凡再竟以交結近侍律言與公俱論死公既在家無
餘貨妻子流二千里天下聞而寃之嗣是無敢復言
套事者而中原內境永陷於幽庭矣

世人多言套不可復邊人則謂公之自山西擢鷹塗
總督也親入河套閱其形勝量其道里察其肥瘠實
見其可復可守故一切悠悠之談曾不能阻至其機
械火器之巧疊出不窮雖古名將有不可及者曾

人製竹箋數千如裝炭者然而疎其孔久積不知其所用一日報鹵至公度其暮當至某河悉令沉之因伏兵於傍鹵至渡河馬足多陷孔中彼此牽制馬不能前伏兵乘之因以大勝往嘗植榆柳塞外以阻鹵騎鹵輒拔之公製木人長尺許中藏機毒置之樹下鹵攫之輒中毒死竟無敢拔所植者榆柳遂成成化間佛郎國入寇中國始得其佛郎機鳥嘴銃公因推其意爲之製子母砲一窩蜂地雷之屬其母砲則以熟鐵爲之子砲則以生鐵爲之貯藥其中以母砲發子砲至鹵所子砲始炸散大者如彈細者如豆中

之無不立斃公初以擊齒子砲已至齒所猶未炸齒乍見未知其能炸也簇而視之遂擊殺數十人邊人稱其應敵之智真運於九天動於九地者不能詳記大都以歲月復套無難也

副都御史孫清愍公繼魯

字道甫號松山其先浙之錢塘人高祖維賢以太學生言事謫戍雲南右衛遂家焉登嘉靖癸未進士官至副都御史卒年僅五十

出知湖廣澧州因事改國子監助教以經學著歷戶部員外郎中監運通州大著冰蘖聲尋擢守衛輝一以公廉惠愛爲亟會歲多蝗復大旱竭誠以禱蝗害除大雨隨應民以爲神當路特薦調知淮安府亦遭旱禱之又輒應民間每晨焚香尸祝之無何中官奉命織造江南道經淮大作威福抗拒之於是構誣於朝

械逮京師賴執政夏公桂洲之力獲解調知貴州之
黎平宣猷敷德苗亦格心靖州叅將歎曰與其選將
董率萬兵守備諸邊莫若選廉吏一人足矣

擢湖廣提學副使士以得師爲幸擢山西左叅政分守
薊南強藩歛職嗣陞山西按察使行之日宗藩以其
持法銜之相與解其裝惟敝衣履數事而已衆咸嘆
服至晉持法益堅兩臺交薦之百姓樂其久任而惟
恐其去雖宗藩亦以爲請乃擢陝西布政使晉秩提
督雁門等關兼巡撫山西右副都御史會有西陲之
事持論與總督翁公不合爲文數百言誓於神慷慨

忠義之氣溢於言表及封事與總督公交上而執政者故先翁而後公竟被誣下錦衣獄先是陝西侍御楊公爵者以言事在獄中無楮具相與取破碗書壁倡和百餘首命日破碗集久之知公者百口直之而山西宗濂抗疏救辯卽前解裝肆挾者也方讀易獄中進退存亡付之一編而執政者阱之不已會疽發於項遂卒年僅五十朝野聞而哀之隆慶改元言官疏其非辜乞賜褒錄制贈兵部左侍郎謚清愍

侍郎楊恪愍公守謙

字允亭號次村長沙人嘉靖己丑進士官至兵部侍郎死於西市時年四十六

七歲授書善屬文器局凝重若老成人稍長爲舉子業卽以古豪傑自許講說經濟敦忠孝大節嘉靖戊子舉於順天己丑登第授工部屯田司主事尋改兵部職方司歷陞本司郎中世廟南巡扈從車駕還賜綵幣陞陝西按察副使丁父憂服闋除陝西督學副使校士至公雖窮邊下邑亡不身歷章縫興起至今思之祀於名宦秩滿陞本省叅政未履任卽陞右僉都

御史奉勅巡撫山西尋改延綏故鹵咽喉西北
重鎮邊垣稍卑鹵每毀之而入公爲增高厚數倍益
置敵臺戍堡鹵萬衆仰攻不能入數獻捷天子喜悅
錫賚無算

庚戌春陞副都御史巡撫保定去延之日軍民老幼祖
送至數百里咸呼曰楊公在邊鹵不敢正視西人高
枕臥一旦去我劙虎牙無日矣甫蒞保定屬北鹵大
舉入寇圍都城中外戒嚴援兵卒無至者公投袂起
曰鹵薄都城主上拊髀人情洶洶爲臣子安忍坐視
卽率部下精兵三千入援世宗皇帝聞勤王兵至大

喜卽降旨楊守謙提兵入援忠勇足嘉其陞兵部侍郎仇鸞有寵於上公督學陝西時鸞爲甘肅總兵潛與鹵通公聞而密白之中丞御史臺事竟寢未發其後鸞知遂恨公切齒至是譖於上曰楊守謙雖勤王實按兵觀望縱賊劫掠世宗大怒逮繫詔獄法司擬戍上愈怒罰治法司特旨坐謙棄市臨刑自若曰臣以勤王及禍讒賊之口實蔽聖聰皇天后土知臣心臣死何恨臣得與岳武穆于肅愍同遊地下足矣無何鸞造逆未就而死事發詔剖棺戮尸妻子閭門斬都市先是公之及禍以八月二十六日而逆鸞被戮

亦適明年是月日人以爲天道不來云

隆慶改元都給事中辛自修御史王好問交章昭雪公忠而受冤詔贈兵部尚書謚恪愍賜祭葬蔭一子忠義之士聞而鼓舞都城父老有泣下者

爲人忠孝天至涵養有道燕居莊肅雖對妻孥不及於蝶狎有庶第二人庶妹一人悉爲鞠育婚姻事庶母宛氏若親母兄弟同居所得祿入悉推與衆不入私橐亢厲廉潔一介不妄取歷官至開府大位蕭然猶寒畯恒以稱貸自給文章尚氣格雄渾昌大詩亦悲壯有唐人風尤長於經濟籌邊有大寧考紫荆考花

馬池考兵部集公雖以忠冤卒蒙聖恩昭雪在順天
長沙祠鄉賢在西安延綏祠名宦而關中士人有死
入冥府見公方爲貴神宮殿服御如王者獲報亦隆
渥矣

巡撫朱公紈

字子純號秋崖長洲人正德庚辰進士官至都察院右副都御史卒年五十八

父昂景寧教諭遭誣罷歸母施生公甫三日異母兄寇欲取統戕之且將圖施母施以百死全之

初守開州陞南職方郎中遷叅議江西初東鄉置縣奸民避徭上公車訴連歲不決立訊得其情移四川按察副使威茂番素騎時出掠官軍一矢不敢發賂遺之乃去至則勒兵待番尚狃焉驟與之戰大獲首功驚請輸平又爲畫所以給餉戍者境遂安無患

辛丑遷叅政山東時以魏滑兵戍鄴之涉縣公當在行
同相度形勢以東兵守甘土嶺畿內兵守毛嶺鄴兵
守故關而又令東人自給饋因下議主客遠近東旣
煩遣率費又千里飛輓非便且守涉者爲隘在南設
鹵山不意入我不守境則何及東人且在敵後矣議
遂奪卒罷屯

丙午進都御史撫贛以閩浙被海郡奸人數與彝市以
私其利積與之通至豪奪殺掠咸爲之嚮導而奸又
藉朝貴以爲之中庇公廉得其狀義不避難卽力疏
請先治其內賊乃敢任捕倭上從之遂理根排治窮

竟其奸旁側目者百方挫沮未得卒能督兵以平閩
同安寇忽有言責者在浙意叵測卽又馳至納之館
以待命持構者方導之爲變造詭語公鎮以靜使不
敢發益督閩將盧鐘由海中趨雙嶼等隘合浙兵進
與賊遇疾力戰縱火張天斬獲甚夥又連戰敗之追
賊入嶼挑之不出乘夜突圍逸棄其巢燔烈之并燔
艘二十七又一巨艘來駐沙中縱追鋒舸益前蹙之
摧破焉獲者溺者斬首愈衆兵勢遂振銅山青嶼南
荒等島穴賊皆望風遁公又親躡其縱於閩海中至
雙嶼議留屯衆難其險絕稍爲築塞而還閩人嫉其

將爲已不利有所論時汀漳失囚逸於海透入於江諸方繹騷又奉詔改巡視益督諸將追賊下溫盤諸出沒所大克又處賊侵亦平之浙以無患而素與賊連者愈憾百端壞敗其功下亦偃蹇不受命公誓以死圖効自辨折蹇蹇不已明年春命督將鐘按察荷喬於闕皆出洋中跡賊至詔安之靈宮澳合諸軍設壘山上下千舸具進賊徒兵伏敗之趨船者疾力蹙之覆溺殺者甚衆擒彙王三人白番十有六黑番四十六皆綈惡異狀可駭賊首貴等一百十二人斬級三十餘他資械等稱是皆五澳宿賊驍黠者并殲

焉及葬之貴王妻妾咸無噍類漳人大恐有盡室浮海者捷聞則與連者無所釋憾反疏言其擅殺作威公罷而諸出死力殺賊者皆召令對簿譴責之矣丁未改浙江巡撫兼攝福興泉州漳未至而海寇泊寧波台州諸近島者已登岸攻掠諸郡邑無算官民廨舍焚燬至數百千區巡按御史裴紳劾防海副使沈瀚守土叅議鄭世威因乞敕公嚴禁泛海通番勾連主藏之徒從之公乃下令禁海凡雙檣餘舡一切毀之違者斬乃日夜練兵呷嚴糾察數尋舶盜淵藪破誅之因上言去外盜易去中國盜難去中國羣盜易去

中國衣冠盜難遂鐫暴貴官家渠魁數人姓名請戒諭之不報於是福建海道副使柯喬都司盧鏗捕獲通番九十餘人以上公立決之於演武場一時諸不便者大譁蓋是時通番浙自寧波定海閩自漳州月巷大率屬諸貴官家咸惴惴重足立相與詆誣不休諷御史周亮給事中葉鎧奏改公爲巡視未幾公復上言長嶼諸處大俠林叅等號稱刺達總管勾連倭舟入港作亂更有巨奸擅造船艦走賊島爲嚮導躡海濱鞫論明確宜正典刑章下兵部侍郎詹榮覆奏中國待外裔不以向背責之以昭天地之量公所論

坐俱開重刑乞下都察院覆覈從之於是御史周亮等劾公注措乖方專殺啓釁因及福建防海副使柯喬都指揮使盧鏗黨公擅殺宜置於理帝遂奪公官命還籍聽理遣給事中杜汝禎往福建會巡按御史陳宗夔訊喬等併覈公事汝禎宗夔勘公聽信姦回柯喬盧鏗擅殺無罪皆當死奏下兵部尚書丁汝夔如其議上帝從之命喬鏗繫福建按察司待決公恚自殺士論惜之

閩中鄉官林希元通番治之亟故嗾言官劾其擅殺而是時言官莫爲之申救者公聽勘居家知必不免嘗

語人曰吾視死如歸耳倘朝議有不測便當自決耳
昔學曾銑爲少年簸弄直至西市平時王聯適計奏
參政朱鴻漸被逮公疑以爲逮已遂服斷腸草自盡
公爲人精嚴勇於任事開府閩浙首嚴通番之禁海道
爲之肅清其疏辭有曰今不依臣區處十年後中國
皆倭賊矣久之果然

作俟命詞曰糾邪定亂不負天子功成身退不負君子
吉凶禍福命而已矣命如之何丹心青史一家非之
一國非之人孰無死維成吾是

自公得罪後其官竟罷不設中外搖手不敢言海禁事

居數年海寇大作東南魚爛者二十餘年而後定

副都御史商端愍公大節

字孟堅號少峯湖廣承天人嘉靖癸未進士官至
左副都御史卒於獄

初令豐城豐法弛難治公至執遠鄉逋頑一二人築之
死豐舊無城閩廣之寇窺掠無已公曰無城無民辛
未之變死者萬人是可以不監乎乃孚號邑之義士
百人爲倡諭以大義千人響應程力出貲不五月而
城成以治行考最召補兵科給事中風裁峻整不避
權貴七年奉命主試雲貴八年勘事江右嘉靖十六
年起復以例降鹽城縣丞尋遷國子監丞歷刑部郎

中十九年陞廣東僉事整飭高肇等處地方進山東叅議歷官右僉都御史巡撫保定贊理軍務兼提督紫荆等關選將練兵以戒不虞公逆知北鹵內侵上重根本拱護京師疏

庚戌夏召入內臺八月鹵大舉薄京師甚急奉上命巡視九門疏又屢上一曰固守關廂以安重地一曰一事權肅號令以肅軍威一曰急殺叛賊以救生靈一日安插內移軍民以免饑餓而懸重賞招忠勇以固根本尤疏內所致意是時逆鸞以公急殺亂賊之語意有所指銜之入骨蓋鸞嘗陰遣家丁時義潛入鹵

營勾引入寇庚戌之變鸞獨引兵入援上予錫駢繁
寵眷獨渥已又冒總京營之命怙寵作威公卿至有
不敢仰視者公義形於色獨不爲下

奉命經畧京城內外招募義勇四千人別爲一軍訓練
鼓舞公奏募興等材力士倍廩精練以備非常鸞以
秋防徵之使隸已麾下復檄公守都城公以卿貳非
鸞所得轄兵部巡卒不隸京營祖宗良法鸞安得專
領因上言鸞包藏禍心宜稍抑之以除禍本忤旨下
獄麾下將領數百人相率詣闕懇冤請以身代無何
華人自鹵逃回者言逆鸞勾引亂華之秘鸞知禍在

日夕乃忿恚疽發背死竟以勾齒剉屍赤族上於是憐公忠義將釋之乃遽卒於獄

平生慷慨負奇氣忠信孝友得之天性而問學則以亟
礪名節忠義爲本遇事英發不肯以天下第一等事
讓他人故自其作敎作縣司練刑駁歷藩臬巡撫畿
甸總憲內臺風裁勲譽卓然獨出於人表云

尚書張襄愍公經

字廷翼福建侯官人正德丁丑進士官至兵部尚書嘉靖乙卯十月死於西市隆慶間昭雪謚襄愍累遷兵部右侍郎嘉靖十五年斷藤峽侯公丁作亂攻殺戊卒十六年公承命代馮旦撫廣集諸司議發兵與安遠侯柳珣決策以屬副使翁萬達乃命百戶許雄綏公丁出執而磔之卽乘勢進兵討平餘賊詳在翁萬達傳捷聞進兵左加一級尋敘功進兵部尚書時邊疆多故上以公能平寇爲知兵議征安南經條上進兵事宜旣而報罷

三十二年公遷南京叅贊兵部尚書適倭寇証東南給事中王國楨御史溫景葵等以倭勢猖獗逼近留都各具疏請兵餉及推選總督大臣重其事權如往年征勦華林麻陽諸寇故事下兵部集議乃以公爲總督南浙福廣山東等處軍務一應兵食許其便宜處分文武官不用命者武自都指揮以下文自五品以下軍法從事節制當天下半開府置幕自辟叅佐公亦慷慨自任中外忻忻皆謂寇不足平時嚴嵩柄政次輔徐階李本皆南浙人日夜以寇深爲慮工部侍郎趙文華嵩黨也上言倭寇日甚請禱於海神以厭

之上卽命文華往祀并督察沿海軍務文華旣至軍
凌轢官吏公私並擾公自以久爲大臣名位出其上
負氣不相下文華恚遂欲甘心先是山東捨手奉調
至一戰於採淘涇而敗東兵遂不振經請調狼土兵
會田州兵先至文華倖功立促之戰復敗於漕涇文
華遂連疏劾經謂經養寇糜財屢失進兵機宜惑于
叅將湯克寬謬言欲俟倭寇飽觸掠餘賊以報功塞
責且曰經才足辦賊以家在閩避賊讐故縱之耳上
聞大怒立命錦衣衛逮經旣而并逮浙江巡撫李天
寵緹騎未至時經已大破倭於王江涇斬首一千九

百餘級自倭入犯以來此爲戰功第一而文華疏先入矣兵科李用敬等五人論救上各予廷杖五十黜爲民而上不無心疑以問大學士嵩嵩對如文華言且以戰功歸文華與按臣胡宗憲而援徐階李本言以實公罪上遂以宗憲代天寵撫浙

公至京上疏自理曰臣自昨歲十一月受總督之任於時倭方盤踞柘林川沙衆且二萬餘吳中民兵脆弱無可制禦乃奏調田州東蘭那地南丹歸順等州狼兵五千名永順保靖二宣慰司土兵千名蓋欲合力併勢爲必勝之筭爾今歲三月各兵繼至臣從宜發

布以田州瓦氏兵配總兵俞大猷屯金山衛爲搗巢
西路以東蘭那地南丹三州兵配游擊鄒繼芳屯閔
港爲搗巢北路以歸順兵及募至思恩兵廣東東莞
打手配參將湯克寬屯乍浦爲西路右哨各令相機
戰守及三月末侍郎趙文華至松大賚諸將趣令進
計然遠調之兵新至之將賊情地利皆所未諳游擊
白汝以田州兵千餘往探遇賊伏發殺頭目鐘富等
損兵大半則狼兵之不宜輕用明矣及四月二十日
永順保靖兵至賊四千餘突犯嘉興臣卽委盧鑑督
保靖兵援嘉興委俞大猷督永順兵由泖湖間道趨

平望以扼賊路令湯克寬引舟師從中路擊之凡斬
馘一千九百有奇焚溺死者無算賊氣遂餒此臣日
夜苦心審畫豈有一毫怠事之念哉臣蒞任方半年
前後俘斬已五千計惟是智畧短淺不能使積年劇
寇頃刻掃蕩此則臣之罪也奏入不省三十四年十
月經與李天寵同棄市人多惜之

少保胡襄懋宗憲

字汝貞號梅林徽州府績溪人嘉靖戊戌進士官
至少保兵部尚書兼右都御史以逮繫卒於詔獄

隆慶初復官賜祭

初授青州府益都令時青齊旱蝗相繼盜賊蜂起公抵
任禱於城隍雨隨應召父老設法捕蝗有罪者以蝗
子贖勤詢疾苦旦暮釐別忽有鳥數萬從北來須臾
食蝗盡爰以大熟

有賊日草上飛虎悍甚有衆數千據礦爲患久莫能制
公召其父母宗族諭以利害示之恩信羣盜解散擇

其可教者千人編爲義勇會有詔令巡撫曾銑募清
齊兵入衛遂以應焉一不以擾其民也

戊申入爲湖廣道御史奉差按宣大延訪士民知鹵情
者虛懷叩問士有機智敢勇者隨才收錄公偵知俺
答將率諸酋入寇畿輔必從黃花古北入急叩總督
蘇祐曰寇且入門庭吾輩安得坐視急遣趙仇二帥
率兵入衛祐卽如公言調二帥至居庸本兵猶謂二
鎮重地不宜輕動阻之關外已而鹵騎自古北口一
夕薄都城夜半出中旨急征關外兵入援而令祐與
宗憲回守鎮城公旣還上谷又謂祐曰賊見二鎮兵

入衛必且乘虛入雲中矣賊已滿載不復散掠我兵
實寡難與爭鋒據險設伏邀其惰歸可也祐從之公
復率二參將兵及素所選士以待賊賊果出雲中縱
其半去伏起襲之鹵戀輜重不戰而遁我師逐之斬
首四十還被擄人畜無筭上因知公名欲大用之矣
三十三年甲寅倭寇浙直勢甚猖獗命公巡按浙江公
至詢民疾苦及致寇之繇力爲振刷乙卯歲柘林賊
首徐海會集陳東麻葉光和尚謀圖杭省爲巢以窺
金陵計以徐海引萬餘賊自柘林出海趨鼈子門陳
東引萬餘賊出澉浦趨海鹽麻葉光和尚引萬餘賊

從乍浦趨湖州約已定三月戊申東從海鹽先至杭
攻圖省城軍門李天寵方被困徐海擁賊從大洋將
入鼈子門去杭不遠以颶風飄還五島餘黨零犯浙
東陷慈谿麻葉等率賊掠嘉善將逼檇李時公方巡
台溫間道馳至嘉禾孟夏甲申賊薄郡城殺戮淫戲
辱示城上公切齒憤恨出酒百餘甕米五十包毒之
封包如故載以二小舟授一二健兒賞寇服文牒若
犒兵者賊見逐之健兒浮水遁賊入舟見寇服文牒
信爲犒兵也呼類歡飲且醉復作飯食之一時流血
暴死者七八百餘賊旣而緝知公計遂相戒勿食民

間遺物會雨驟至又無所得食淋漓饑困斃者益衆
遂解圍去

三十四年乙卯二月工部侍郎趙文華祭告海神兼視
軍情四月至松江祭海是時倭據川沙窪柘林爲巢
涉冬春新倭復日有至者地方甚恐及狼兵至者五
千人衆稍安總兵俞大猷遣游擊白法等稍有斬獲
文華因謂狼兵果可用厚犒之激使進勦至曹涇遇
倭數百人與戰不勝頭目鍾富黃維等十四人俱死
失亡甚衆於是賊知狼兵不足畏復肆掠如故五月
張經蹙倭於王江涇大破之經素貴倨以文華部民

也藐之觸怒會倭寇蘇州大掠卽奏經畏懦失機玩
寇殃民上怒逮經及巡撫李天寵問斬以應天巡撫
周珫代經尋以珫衰老黜之以南侍郎楊宜代超入
僉都御史代天寵而先四月公上疏請宣諭日本覆
允比得旨新受事檄寧波選委知海情者得弟子員
蔣洲陳可願二人因令充正副使而先犯海禁繫獄
朱尚禮胡節中并釋令各募二十人輔洲等賚文以
往公密授計洲以十月壬午行十一月丙午至日本
從山口豐後二道宣諭王直故爲舶主原徽州人因
令養子毛列率衆邀洲等至五島詢以故洲等奉計

誘之直佯言曰我本非爲亂因偷總兵圖我拘收家屬遂絕歸路今軍門如是寬仁我將歸然毋用人衆也今聞薩摩島徐海等大糾倭衆來春必犯浙直吾令毛列葉宗滿伴送陳副使朱尚禮先覆軍門吾與蔣先生宣諭畢日亦同歸順但倭國缺絲綿必須開市海患乃平可願借毛列以仲冬閏月滬列港至定海開已而直勦殺海洋流賊數十級斂功以窺我意公詢得其情奏聞且厚犒之趙文華遂請還京三十五年丙辰正月列率倭兵百八十人助盧叅將擣舟山賊斬首三十餘賊奔邵嶼山屯於山巔公奉旨

費列等金幣且令回諭直早歸順列感激因送商伴
夏正童華邵岳報徐海入犯消息遂留爲通事陰厚
遇之意未嘗一日不在直也是月辛酉賊數百自閩
連江洪突犯平陽仙居等縣趣四明奉化合錢倉新
至賊深入上虞轉戰千里官軍望風奔潰海道孫弘
軾馳檄告急甲子自率標兵渡錢江而東合諸道兵
及容美土兵皆會丁卯賊由上浦潛渡曹娥江見官
兵由對山出海塘轉山陰壬申公至江橋遇賊夾河
而行從馬上操小旗語諸將曰使此賊見我旗指不
顧而西勝負未可知若觀望遲疑即可撲滅也賊見

旗東西交指果聚立公笑曰賊氣奪矣麾兵渡河賊驚問諜者知軍門自至遂不敢戰南走後梅村急麾諸軍圍之一晝夜用火器力攻賊負傷深匿戰益急我兵登屋舉火煙焰大起賊多焚死已而雷雨大至公與諸將冒雨立水田中或勸之少避不聽明日五鼓賊乘霧突鄉兵我軍四合奮擊俘斬二百五十九餘賊逸走鍾村平明追及西嶺殺百賊賊又遁輕兵追之少衄復遣土兵及于蒲岐亭斬六十級餘賊夜遁入海先是居民聞賊至咸奔避入城公所至炊宿無所薄暮入山巔小菴饑甚道人具酒餅以獻方數

酌哨者至備詢其故已而問哨者食否答曰枵腹兩
日矣公淚下盡撤酒餅與之道人進曰菴中僅有此
願少留公曰此探卒吾三軍耳目也不得食必斃寧
忍饑以食有功左右皆感泣時陳東屯於陶宅知公
悉軍而東復襲敗官軍楊宜勦新場倭又敗罷之以
南侍郎王誥代而先文華還京言倭大勢已定餘零
散者諸將勦之可立盡旣敗報踵至上甚疑以問嚴
嵩嵩支吾以對文華大懼而素與吏部尚書李默有
違言因訐默出題謗訕欲敗國事初罷楊宜卽當以
宗憲代而專懷自用推舉周珫珫老悖致殘倭復熾

上大怒收默下獄止誥無行陞公兵部侍郎兼僉都
總督軍務陞阮鶚代巡撫浙江

四月鶚敗於崇德陷驍將宗禮等走桐鄉被圍公聞之
驚悼曰河朔兵旣敗我兵皆氣奪莫敢戰東南之事
無復可支矣賊已困桐鄉假令復分兵困崇德以劫
我我兩人譬之抱而自沉也惟有用間餌以伐其謀
携其黨出阮公而徐圖之耳乃捐萬金囚毛列所送
謀者夏正童華邵岳朱尚禮等令賚入賊營聽其出
入又爲劄書以付徐海曰直已遣子欵定海關朝廷
固且赦之矣若獨無意乎新總督威名非曩時比且

仰體朝廷德意推心置人腹若不乘此時解甲自謝
他日必爲鹵矣海頗然其計於是亦遣酋自謝約罷
圍去因以要公稍出中國貨物遺他倭酋而疏釋其
罪公佯諾輒以銀牌綺幣厚遺來謝酋而陰令營中
盛兵容私謀者故縱酋瞰之酋旣德公遺又內怖公
之兵威也歸以報於海明日復遣他酋來謝公視之
如初凡數往復海於是始歸心於公頗爲公死矣然
陳東獨心竊疑海私公遺猶鞅鞅未知從也海覬遣
首次桐鄉城下私城上兵曰某已聽總督胡公約解
去矣城東門故柘林賊陳東黨也鴛悍不吾從若謹

備之是夕海果道崇德而西且乞他兵於公以夾擊
東公猶心訝未之許而東獨盛爲樓櫓撞竿以撞城
而桐鄉令金燕者彊幹吏也城中一切兵仗火藥諸
已繕備提督阮公復躬厲矢石徇城上人令令散千
金募敢死之士督戰益急所殺傷賊亦數十人方撞
竿自樓櫓中躍而撞城城幾壞一男子爲縉索圍撞
竿所擊故竊處竿至卽縉挽以上斬之又募冶者煮
鐵汁灌城下酋城下酋不敢逼東旣無何聞海等解
去道遠勢且孤亦相與稍稍引去圍始解而提督阮
公出矣

公謂他賊無足慮惟海巨孽名雖內附中未可測而上海賊萬餘方繇吳淞江西引涉嘉善欲與海合公私念曰西賊合勢愈甚萬一海變何以圖之乃乘上海賊未至亟遣諜語海曰而旣內附何不如故約勒兵擊上海賊以自效海然其計卽引諸酋逆於朱涇斬首三十餘餘賊遂夜走出海是役也斬級雖少而所以散其合者則得策矣

公又遣總兵俞大猷伏飛艦海上遮擊之溺且盡於是海旣德公不敢背又聞吳淞江賊之出爲海兵所遮擊益亟凡割輸欵於公遂輦故所戴飛魚冠及他堅

甲名劍數十種並以輸公而且遣其弟洪入質於公
公固佯納之公又諜聞海麾下獨書記葉麻爲長酋
其爲人頗黠而悍近與海爭一女子有微郤非用間
急縛之則無以死彼內附之心於是遣諜就海帳中
諷海縛葉麻以出葉麻出而諸酋中故隸葉麻部曲
者稍稍怨且懼矣怨且懼恐生他釁則又以他罪縛
之幾百餘人公又策陳東於諸部曲中與葉麻聲相
倚頃以洞鄉之役兩侍女日夜說海并縛東海旣諾而
陳東者薩摩王弟故帳下書記首海固未之能也於

是出葉麻囚中令其詐爲書於東反兵賊殺海與書
故不以遺東陰泄之於海激怒之使并縛東海讀其
書涕雙下益德公之不忍爲東所賊殺之也日夜遂
謀縛東以報公亡何文華移兵渡江所過州縣數勝
賊兵威大振而公以海之甘心於東一意俟其相圖
不敢疾擊力以苦心告文華乃召故所遣諜而詰之
曰若爲我諭海海罪不容死非縛陳東及斬千餘級
以獻恐無以謝朝廷若能則吾當與督府疏釋之不
然蓋粉矣會阮鶚亦至海亟乃出中國貨物千餘金
賂王弟詐請東代署書記海因夜得東卽縛以踐約

諸酋長見葉與東相繼縛益洶洶內亂晝夜擊殺互相翦屠海亦內困氣日窘自度卽獲反故島必爲諸酋長所賊殺故內附日固而公與文華薄責海益急海旣急因念欲掠舟出海恐爲海上兵所刦欲列壘拒官兵又業已內附不忍背且陳東黨固日夜襲殺之也公策曰彼旣亂我可乘之矣因遣諜私海曰我固欲寬若趙尚書爺以若罪孽大何不聽我艦數十艘海上若且誘之逐海上艘令俘斬千餘級以謝趙八而若因得以自完乎海不得已且疑且諾因約兵備副使劉公引兵伏乍浦城中而某日時某當引衆

出海岸去乍浦城半里而陣佯令衆酋逐海上艘某手旗麾之城中官兵卽舉燧爲號從城中出亟擊勿失諸官兵卒如故約乘之諸倭酋逐海上艘如蟻不及還兵鬪於是諸官兵得乘勝躁而前不傷一卒所俘斬數十百人沒海者無筭於是海自以數有功於朝廷願與部下諸酋長入欵具庭謁胡公與尚書趙公提督阮公及巡按趙公並許之謀往復期以八月初二日然海猶恐陰設甲士刦之先期一日卒擁首數百人胄而陣平湖城外自帥酋長百餘人胄而入平湖城中求欵四公者計不許恐他變遂許海與諸

酋長北嚮面四公按次稽首呼天星爺死罪死罪海
欲再爲欵胡公而未之識因顧諤諤目示之海復面
胡公稽首呼天星爺死罪死罪胡公亦下堂手摩海
頭謂之曰若苦東南久矣今旣內附朝廷且赦若慎
勿再爲孽海復稽首呼天星爺死罪死罪於是四公
厚犒遺之而出是日城中人無不灑然色變者海旣
出諸公者固已忿恚海之列欵猶胄而入屬疆脇無
禮又不及如謀故所期月日而先日卒至也其習行
黠若此於是閩謀不勒兵誅之他日必爲患計部下
尚千餘人猛驚難卽破永保兵猶迤邐遠道未至也

於是佯令海自擇便地居之海果自擇沈家庄卽餓
沈家庄與居之是爲八月八日當是時衆復誼然譁
諸公輩何不撲滅海不然且縱之出海上令自解去
顧參虎以自禍也不知諸公者固有待於是胡公與
尚書趙公提督阮公私自部署兵又日夜遣使趣永
保兵來會兵未集恐海驚禍且肘腋間胡公日遣諜
調海且憎海如曩時因謀以請於趙公曰吾聞善兵
者乖其所之海與陳東黨業已深相仇今合而兩附
者迫故耳聞沈家庄故東西兩處而中綰河爲塹何
不說海以西沈家庄居陳東黨而自擇東沈家庄以

居部下酋平謀以諭海海果如其言頃之永保兵至
會海輸二百金於公市酒米公復與趙公謀以築毒
其中而歸之又令陳東詐爲書夜遺其黨曰海已約
官兵夾剿汝輩矣陳東黨果疑而夜伏邏卒東沈家
庄道上矙之適海皇急因令酋竊兩侍女出道上而
急則因間道走莫府以自托邏卒瞰知之歸以報於
陳東黨陳東黨聞之大驚卽勒兵篡兩侍女過海所
罵曰吾死若俱死耳遂私相稍而鬪海中稍衆大亂
明日官兵四面合墻立而進保靖兵先嘗之稍卻河
朔兵乘之又却俄而胡公擐甲厲聲叱永保兵左右

列大呼而入瞰壘下擊會風烈公麾衆東千餘炬人各持炬縱火焚之海窘甚遂沉河死甫食頃人人驚而搜千餘首蒐斬殆盡矣中所故飲毒首齒黑色者凡三百餘人於是永保兵俘兩侍女而前問海何在兩侍女者王姓一名翠翹一名綠姝故歌伎也兩侍女泣而指海所自沉河處永保兵遂蹈河斬海級以歸

直隸諸倭俘斬殆盡惟浙東賊走舟山據險結巢未下官兵環守之不能克諸領土兵俱已遣歸而川貴兵六千人始至胡公方冒矢石入城大猷經營舟山

之賊會夜大雪大猷乃督兵四面攻之賊悉銳出敵官軍競進賊敗歸乃以棕蓑捲火擲之賊四散潰斬首一百四十餘級餘悉焚死

徐海等旣死王直復糾衆三千餘入寧波岑港以送蔣洲爲名公遂遣夏正等往覘而自提兵駐紹興且令畫工圖岑港形勢正還報直語甚肆謂必待奏奉明旨許其寃宥與以都督職使得稽壓海上開市以息兵方圖歸順必不效徐海墮牢籠作俘囚也而畫工所圖形勢甚險惡四山峭立海環其外入口僅容一舟別無他道公覽之謬曰此絕地也乃令直長子澄

述祖母意爲書道制府恩厚促直早歸順以全母子之情遣直中表方大忠偕夏正等持往直啓書笑罵曰兒駛何至此汝父在故厚汝父歸闔門駢首僇矣大忠與正等曉譬百端直意稍動遣王激葉宗滿隨方大忠蔣洲至軍門輸欵公因送監軍御史王本固本固疏其狀於朝公念激乃直之養子用事不還直且疑而生變因言於本固送還將行公故引之臥內留其宿而預爲題稿力乞貸直并諸將請戰書十餘篇置之案間乃出飲大醉還因呼激入宿而公甫入室大吐牀席俱沾污侍者皆就寢激聞鼾聲滿室竊

起翻案聞見疏稿回顧公睡益熟因錄其疏復就榻久之公乃作伸欠狀呼茶且易枕而寢晨起漱卽於榻前告行復好言慰之陰檄文武諸將吏聯絡綦布以防奔逸又密遣諜餌德陽諸酋長購直首使之自疑直方猶豫不知所出漱等至出疏稿示之直猶未決漱等力勸之乃留夏正爲質自挈妻孥稽額制府公大喜摩頂曰兒來何晚時長至前三日也乃使朱尚禮董華館伴至杭叅謁監軍次日卽回軍還杭具述始末聞於朝又爲書達當事言兵機忌泄如上意罪止於直則已必欲盡其餘黨乞密啓上萬勿宣之

明旨時倭賊諸奸多在直舟公將以直爲媒漸致之
不煩甲兵談笑以靖禍本監軍疏先至輒奉旨悉勦
餘黨矣然公已逆慮其然先遣朱尚禮往說諸小酋
夏正及諭王激葉宗滿來杭激等以候旨爲辭而
遣還其驍銳吳九項松王四等四散探旨童華以告
公分遣將吏密擒之明年二月本兵檄至直遂下獄
德陽走滬港諸酋復叛朱尚禮先聞脫身走夏正遂
爲所銅公卽移師寧波調集諸將水陸攻勦賊堅壁
不出我師亦不得入公曰曩謂兵機不可洩正慮今
日惟坐困不憂不全勝也時及汛期新倭續至或抵

普隨逼烏沙門或自峒嶺奔東北洋或自洋中趨舟山則水兵擒斬之或犯樂清金鄉梅頭臨海松門或攻太平台州溫州永嘉磐石象山仙居平陽四散流突則陸兵擒斬之其追至鐵場山者諸軍冒險奪嶺三面奮擊賊從山後奔陷海塗中長跪受刃俘斬無遺大都賊之驍悍非徐海陳東比而我將士久戰胆力益壯習知賊技不足畏避雖不無一二失律而所至成功卒無有得與直黨合者其黨困甚聞有賊在朱家尖遣六百餘人自滄港奔沈家門援之又從響礁門出碇礮奔沈家門皆爲我師所邀俱敗入巢公

乃命朱尚禮以先所收撫倭人彙來廷彙來住等駕
艇伏砲其中冒爲倭船招之賊不疑登舟來廷等佯
稱還報易八刺虎先行砲從舵後發舟爲熑燼水兵
乘之俘獲二十二名斬級二百五十沈溺者無筭賊
氣日挫因嚴督諸軍分番攻巢殺傷甚衆諸賊積恨
爲夏正所誘支解之公聞躬至海邊望祭慟哭諸軍
皆爲墮淚賊自知勢孤援絕焚其餘舟將并力出海
官兵乘勢焚柵燬火光燭天各賊夜奔柯梅候潮圖
歸官軍擊之賊乘東仔小舟遁出浦水兵擊沈其半
斬首九十有七諸將復統蒼船追之渝山外洋沈其

四舟生擒賊首汪印山陳禮計得脫者不及十一矣
是時賊至江南者千餘水兵禦之不得登陸遂扼之
於崇明之三沙江北之賊幾七千北枝據淮安之廟
灣南枝據揚州之如皋公皆分兵助戰前後斬馘俱
盡三沙賊爲官兵所困不得騎乃卸屋材爲小舟以
遁竄至江北亦殲焉三十八年十一月本兵再馭王
直等罪狀下撫按三司詳議梟斬於市妻子沒官葉
宗滿免死戍邊加公太子太保左都御史廢一子錦
衣副千戶文武將吏各加陞賞夏正死事贈都指揮
使廢一子與朱尚禮童華邵岳俱正千戶

先是處賊萬餘盜義烏礦會令缺丞尉率鄉民逐之賊
易丞尉列陣而出戕鄉民民怒奮力死鬪賊披靡入
山民追破其巢賊悉戰死公聞之喜曰處賊稱悍烏
民一戰殲之勇可知已吾方求其人而不得倘新尹
任事湊可不征調而強矣會江陰趙大河宰義烏謁
制府卽語以故大河欣然任之遂令戚繼光與之偕
給餉甚厚繼光行復語曰江南所以不能戰者以未
諳節制耳吾每思倣六花陣法訓練爾喻之乎繼光
因獻鴛鴦陣公曰得之矣自後義烏兵遂以勁名天下
下今所稱南兵是也有事調用遂以爲常

閩倭復猖獗以公爲兵部尚書兼右都御史總督浙直
福建軍務公檄戚繼光所練義烏兵備之時公念賊
勢重官軍難於兼顧北敗於台必南趨於溫乃僞爲
溫卒家信百餘緘及散銀雜裹之言胡總制率大兵
將由台征閩使遷卒附舟往令見賊卽棄以走時鐵
場選賊果長驅至溫方肆掠村市舟至爭逐之遷卒
走賊解包得書相聚錯愕頃之俱遁入海未幾公爲
給事中陸鳳儀論劾上令逮詔獄勒間住浙直總督
遂罷不補

給事中羅嘉賓御史龐尚鵬劾公侵盜軍需三萬三千

計公上疏自訟臣爲國除寃用間用餌不有小費不可以就大謀而忌者遂緣此生奸指爲侵尅臣誠不能以危疑之迹自理於謠謗之口乞賜罷以待公論稍明然後東西南北惟上所用上優詔慰留之先是公以賊勢縱橫非事不中制請必允行不能取功也輦金帛子女以賄分宜殊不敢怯華亭則稍殺之蓋旣虞分宜之忌其兩交又謂桑梓慘禍必華亭所急吾爲以身保障良厚幸矣倘有恕心乎不謂其怨刺骨也及至是分宜敗華亭柄用公亦知禍機欲發覓其私人輦重賄賄之且遍貽其家人子弟華亭視

爲固然怨卒不解乃上固知公旣而法司問擬乃奉
旨云胡宗憲原非嵩黨自御史至今官皆朕陞用任
事已八九年數載無言伊過羣邪朋害大臣罷斥亦
不少又言王直原本兵議示獲者五等封官今却加
罪後來誰肯與我任事放了着閒住公得歸華亭復
令郡縣何東序謝廷傑輩伺其動靜因構與公仇者
謂其侵匿羅龍文財產復奉旨逮繫錦衣未幾竟卒
於獄穆廟登極始荷昭雪復官賜祭世謂公論之終
不可泯云

公爲總督先後上疏皆手書如一後被劾爲土所憐蓋

不獨有禦倭之功其一叚敬謹心亦自難及孰謂公
僅麤豪人物哉

唐鶴徵曰胡少保才氣豪邁志在武功交通權貴饋貽
過當奔走門下者無擇賢不肖亦不問其有益與否
至則概滿其欲而去虛耗民財幾與軍興等費律以
士君子繩墨何所逃罪然方徐海輩猖獗時同事相
讒危疑特甚以欲歛未歛叵測之黠彞當且信且疑
無厭之督視萬一有變身不足言其如國事何昔人
有云貨以藩身况因之以安國家之杌陧免生靈之
荼毒乎且其籠絡之術旣窮於徐海復欲用之王直

直之言曰必不效徐海墮牢籠作俘囚也少保竟以
香餌得之則其苦心妙手機變無窮不言可知已其
功如此實亦以饋貽賚予得力余以爲其費雖倍蓰
於當日不得而罪也

李樂曰胡公濫費之過或不可免而當時寇勢方張人
無固志使公徒隨常謹守出納之吝何以使陳可願
等猝死行間餌致徐海王直輩哉古云財者君之所
輕死者士之所重君不能委其所輕而責士以捨其所
重不亦難乎漢高以黃金四萬斤聽陳平所行終
至勝楚亦知此術爾然則公之度量豈易及哉況世

藩誅求百出稍不如意公又將繼張經李天寵而肆
諸市朝矣所謂權臣在內而大將豈能立功於外者
公之獲保首領益能以餌王直者餌世蕃爾亦可悲
夫

明名臣言行錄卷第五十九

終